

## Aisaia

### *Waeuwa uawa*

Aisaia buka ema girumalen. Me God perowetawa debamawa Ierusalem bedewe wandie. Buka ema bedewe gagalo uwa natadea winei.

Nepa 1-39 bedewe tawo Asaria warerewa ita sorodiawa do Israel ita Iuda onau eneie aimoia umanau wade. Ita peroweta Aisaia Iuda apanawa wasaumodia sumanaibu mai warere ita mo sorodiau do bedeuwo itumpa, tane mo sumanaibu God os mampe itumpe ita do me aiawa ruawantompa.

Nepa 40-55 bedewe tawo Babilon warerewa bola Iuda apanawa onau enene aimone ita otamone me bolawa Babilon bedewe alena umanawa wade. Ita peroweta Iuda apanawa wasaumode God ando leumopio Ierusalemwa wimopuo me ina sanaa wanamopio wampu.

Nepa 56-66 bedewe Iuda apanawa leuntone Ierusalemwa wimoiena umanau wade ita peroweta God dima Ierusalem, bola daitada, uwa daitada ita dan daitada tawo osowe waimoia mampo dewasapia umanawa wade.

## 2

### *Apama Iawe God wadiwa osowe antoi*

<sup>1</sup> Iawe God ando Iuda ita Ierusalem mampo dima dewasapia umanawa Aisaia Eimos otopa benemasadio atenleide.

**2** Walama iedia wisepio wadi dainea osowe,  
 Iawe God duwa enedia uduudu  
 onapoidolepie enakasalepi,  
 wadi sa ionoidolepie isiwa nanaumopi.

Tawo uduudu apanawa esa rua memepuaubepue  
 me wawa bumpe auwepu.

**3** Ita apana sa wapue wapuase,  
 “Winleno odate antata Iawe God wadiwa osowe  
 Israelwa Godiu duwa enediawo.

Sape me dima menasadia no waeuwaneepio  
 dewasante wainenta.

Me no waeuwaneepio intawa asiasi antonta.

Iawe God wadiwa Saion osowee me anaanawa  
 nosepie alepi,  
 ita me aiawa Ierusalemwae nosepie alepio  
 apanawa etapu.\*

**4** Me bola daitada apanawa empuempuntoie  
 waimoia kotumopio  
 dodomanantopue wampudewantopu.

Mo onau puraiwawa dewamopuo irai dipawa  
 segantopu,  
 ita mo eu epadodomanamopuo isima segan-  
 topu iraibu simbihamompa baiwa.

Ita bola daitada onau apanawa mai osowe onau  
 puraiwawa otamopue onantopu.

Mo mai ona baiwa imaantopu, diaida.

**5** Iakob nosinosiwa, winleno Iawe God sapawa  
 bedewainta antonta.”

\* **2:3:** Saion ipa bola dea tontawa bola debawa Ierusalem bedewe  
 winede. Bola sa wadi iwa osowe winede ita God duwa sape  
 wadeiena. Iawe aiawa bola sa dea bedewe nosedie aleide.

**5***Wain iraiwa sasawa*

- <sup>1</sup> Me mida ne nuawadawadasadina sasawa wapa,  
me wainiwa irailena sasawa wapa:  
Ne nuawadawada sona wainiwa iraiwa wadi  
sainape dogo eudida osowe ain.<sup>◊</sup>
- <sup>2</sup> Me dogo nobalene seu nambemone ita wainiwa  
eubuida naumba menasadia rua aimon.  
Ita irai sa bedewe iwulempe waimpa apewa  
wawa dauma iono waden,  
ita do wain gadawa abomawa\* dewasane itun.  
Ema aupe wain ipawa eubu daudaua banubu  
alen,  
tane me ipawa kadiu moa epaepala os ewa-  
mon.
- <sup>3</sup> Tauma ne nuawadawada sona wane wanase,  
“E mida Ierusalem ita Iuda bedewe waini-  
lana,  
ne ita wain aina iraiwa maininene ewanene  
wano etapo irai ainaa kadilen ba ne  
ainakadisana!
- <sup>4</sup> Nitu dinea ne mai dewasapona baiwa iraina  
kadilen? Ipawa ne mai nitu da dewas-  
apakadisapona, diaida.  
Ne menanena iraina bedewe ipawa eubu  
ewamopona, tane kadiu moa epaepala os  
ewamona.

---

<sup>◊</sup> **5:1:** Matiu 21.33; Mak 12.1; Luk 20.9    <sup>\*</sup> **5:2:** Aboma umanawa  
wadia sa ipa. Mo nau wokontoio aboma segaleidio bedewe wain  
teie ansisisaio esapa nagawa da dewasaiena bedewe nosedie dugi  
bedewe aleide nampaa baiwa.

**5** Sa baiwa ne wain aina iraiwa mampe ambi de-wasapaa insaisawantedina umanawa di-alepo etana:

Ne me enabodawa gedara ainepanana bowiantapo ita me kadi donsapi.

Ne me belawa einaa epateiantea,  
ita pue dobinoa odapue ipau namopue  
ita irai sa ansisisapue kadisapu.

**6** Ita ne irai sa epo rokoulepi,  
ne mai wain sa simbiasape deunteapa ba  
dogowa nobanteapa, dia.

Tane ne epo gedara taupibodepi,  
ita do unu anaanasapo mai wapie irai sa  
butasapi, dia.”

**7** Israel apanawa ipa Iawe God Mukamukaua  
wainiwa iraiwa,

ita Iuda apanawa sa ipa me wainiwaida  
meba aina nuawa eusampaa baiwa,  
sa baiwa me menasana mo insadewasantoipe  
dewa intawe dodomana dewasaipona,  
tane mo kadiwa dewasane sosou  
epaboiamoiena.

Mo dodomana dewasapona me insaisawaleidie,  
tane mo sosou mampo kadiwa dewasaio  
pokawa eteie sidantoia etedie.

## 6

### *Iawe God Aisaia sonabede*

**1** Ena sa deawa bedewe warere Usaia boleno  
ne Tatamba sapawa debama do kolaiwata osowe  
ionoido wandio ewana. Ita me gara taudia  
lalaleno duwa bedewa uduudu rupusanboden.

**2** Me tampeinta nitu wanwanlala ebou serapim mabupu 6 dolala ewaewau ia idie bumeidia rua eneie, mo mabupu nata mampe nambu rupumoiena ita nata da mampe wau rupumoiena ita mabupu nata da mampe lapopontoie.

**3** Mo mukantoie muba waie waiase,  
“Iawe God Mukamukaua ipa kakaiwa, kakaiwa ita kakaiwaida.

Me sapawa tawo uduudu sapasade.”<sup>☆</sup>

**4** Mo aiau moinawa du unsiawa dewamono uwauwanton ita du sa bedewa gasu nopesan.<sup>☆</sup>

**5** Ne ema ewane wanaase, “Akaio! Ne emanawoido warere me ipa Iawe God Mukamukaua ewana. Ne mai inanteapa rua aitamana kadiwa donsana, ipawa ne kadi do ita moana kadiwa wawala ita apava mida ne bedeuwo wainedina moau kadiwa wawala waimoi.”

**6** Ema aupe serapim bedeuwo dea lapopolene mainawo winin. Me wata osowe ia bupa iilala abina mampe abinene wadene do mainawo wisen.

**7** Me ia bupa iila sa ne moanawo itune ita wanase, “Ewee, ia bupa ema e moaa wirasan, sa ipa tauma e wawua wadenauben ita kadia insendabuasan.”

**8** Ema aupe ne etedino Tatamba wane wanase, “No gagalomba benemala apanawa dainea wataaubeto alepi apava ema mampo? Mida no baimba alepi?”

Me epe wadio ne sipoasane wanaase, “Ne ema ambi! Ne waaubaneawo anteapa!”

---

<sup>☆</sup> **6:3:** Gagalo 4.8    <sup>☆</sup> **6:4:** Gagalo 15.8

## 7

*Iawe God Imanuel mulepia umanawa wade*

<sup>10</sup> Iawe God osowe Akas mampe Aisaia bedewe gagalosane wanase,

<sup>11</sup> “Iawe e Goda iririsawo eueuwa da euwaepi. Me eueuwa da bolala bolauwo ba naepe iono uboo euwaepia iririwasaa.”

<sup>12</sup> Tane warere Akas sipoasane wanase, “Ne mai menaneipona Iawe God rubusapa baiwa mampe eueuwa baiwa iririwanteapa.”

<sup>13</sup> Tane Aisaia wanase, “E warere Dawid nosino siwa assisuneanuno gagalonteapa! E God aiawa mai eteipe ruawaitipona mampe apama nuamba surakausailana mai pokaleipona baiwa, God do nuawa surakausailana, ba?

<sup>14</sup> E epe dewaitena baiwa Tatamba me meba eueuwa da sabamosapio ateitana. Sa ipa: I sanaa bulepie oto mona gamosapi, ita mo me ebowa itupue wapuase, *Immanuel.*” (Ebo ema ipawa ipa *God no do*).<sup>✳</sup>

## 9

*Iawe God oto mona wanamopia umanawa wade*

<sup>1</sup> Walama sawo apama mai poka eteia do wankasantopu. Sebulun ita Napitali bedewe wanwalala apama ituaisimoio nuaparentoie waimoia, walama iedia wisepio uwa daitada apanawa Galili ita Mediterenian Owawa tampe

---

<sup>✳</sup> **7:14:** Matiu 1.23

ita Ioadan esawa nosena sawano inta debama nowa oso\* waimoia ebou debamalepi.◊

**2** Apana mida dubawa bedewe waimoia,  
sapa debamaia ewei.

Ita mida bolala rua waimoia  
osouwo sapa Wade.◊

**3** Iawe God e mo dewamoano uarantone nuaeunttoi,  
e mo dewamoano nuaeunttoi.

E dima mo mampo dewasaana baiwa nuaeuwanttoi.

Mo nuaeuwau sa ipa maura debama uwauwantoie nuaeuwantoia rua,  
ba sorodia antoie emalawoau apanawa aimoie aupe nitubu oteie nuaeuwantoia rua.

**6** Oto no mainimbo mulen,  
Iawe God oto mona amonalene no nenen.  
Me muka wadepie mukamukaua no onianepi  
ita apana me ebowa wampe wampase,  
“Me ebowa ipa Wadewasa Apanawa Eudida,  
God Mukamukaua, Wanwankasalala  
Mamba,  
Warere Wanwan Euda Obasa Wade  
Wisepi.

**7** Me onionia mukawa ita wanwan euda wadene  
wisena debamalepie winakasalempa.

\* **9:1:** Inta debamawa sa ipa, bola debama Babilon ita bola isiwa apanawa sapeinta wimoie inta debamawa asiasi Mediterenian Owawa tampe bola wineia bedeuwo antoia umanawa wade.

◊ **9:1:** Matiu 4.15   ◊ **9:2:** Matiu 4.16; Luk 1.79

Me warere Dawid aupawa wadepie wampie  
gonaawa oniepi.

Me dodomana mampe ita do ulaipa mampe  
apana oniamompaa bedewe me gonaawa  
badowa enakasalepi.

Iawe God Mukamukaua, me ando epe dewas-  
apio segalepia rua,  
ipawa me apanawa nu-  
awadawadaidamode.”<sup>◊</sup>

## 11

### *Iawe God wanwan euda obasa warerewa wapi-aubepi*

<sup>1</sup> Iese nosinosiwa bedeuwo, warere dea sanaa,  
ia iwa osowe seupa inileidia rua wisepi.<sup>◊</sup>

<sup>2</sup> Iawe God aleupa ipa me do,  
aleu sa me insadewasa ita aten wanepio  
apanawa oniadewasamopi,  
aleu sa me banlempo dima me insedia  
intawa dodomana asiisi wampie de-  
wasampe apanawa banladewasamompa,  
ita aleu sa me dewasapio God atensampe  
wiwirawalempa.

<sup>3</sup> Ita me Iawe God aiawa ruawalempaa mampe  
nuaeulempa,  
Me mai emawa ba asiwa etedia asiisi apana  
kotumopi, dia.

<sup>4</sup> Me apana nuaparelala ulaipa ita dodomana  
mampe kotumopi,  
mo mida oauarau ita mukausiawaia  
saumopie dodomanamopi.

---

<sup>◊</sup> 9:7: Luk 1.32,33    <sup>◊</sup> 11:1: Gagalo 5.5; 22.16

Me aiawa ipa koina badowa rua tawo epompa,  
 ita me aiawa sa apana kadi dewalala  
 epaboiamopi.<sup>◊</sup>

<sup>5</sup> Dowa dodomana ipa iga rua me nowe taupi,  
 ita euda wadepiitue dewakasalempaa de-  
 wawa gara nouwo tauia rua nowe taupi.<sup>◊</sup>

<sup>6</sup> Walama sawo pue dobinoa ita manasau  
 duwa wanwanlala awodeatopue euda  
 os waimompa,  
 sa ipa elo onawau sipsip bunau do awodea  
 waimompa,  
 pue ebowa leopat ita gote bunau do awodea  
 ituntompa,  
 ita laion kau bunawa do awodea nana nampa  
 ita seda kerakera pue sa oniamompa.

<sup>7</sup> Kau ita bea awodea nana nampa,  
 ita mo obampu gegelau awodea euda os  
 ituntompa.

Ita laion kau ruau ina nampa.

<sup>8</sup> Seda gegelau mota onawaau nagau moapo  
 owantompa,  
 seda kerakera mota onawaau dubu bedewe  
 witapu noanempa.

<sup>9</sup> Ne wadina kakaiwa osowe mo mai muba onan-  
 topue kadikadintopu,  
 ipawa mo mida Iawe God atensapua  
 apanawa bola sa nopesapu,  
 esa owa nopesadia rua.

<sup>10</sup> Walama sawo warere sanaa Iese nosinosiwa  
 bedeuwoe wisepia,

---

<sup>◊</sup> **11:4:** 2 Tesal 2.8    <sup>◊</sup> **11:5:** Epesus 6.14

me ipa eueuwa uwa daitada apanawa tawo  
osowe waimoia baibu.  
Ita apava uduudu me atensapua baiwa mampe  
antopu,  
ita me bubuawa bolawa bedewe sapa ita ebo  
debama winakasalepi. <sup>◊</sup>

## 35

*Iawe God nuae debama apava mida me ina-  
mona wanamode*

- 1 Sala makowa bedewe mai dima da euda  
wineipona, tane ando nuaeulepi,  
ita sala makowa sa bedewe beran kelontopu.
- 2 Beran ita ina daitada inintopue bola sa nope-  
sapu,  
ita bola sa nuaeulepie nuae kawa debama  
wapi.

Bola sa ando ewaewa eudida uwatauwa segalepi  
Lebanon wadiwa eubu eneia ruau,  
ita me inainamba eudewadewaleidie wine-  
dia ewaewa sala apuapua Kamel ita Saron  
bedeuwo ina daitada inintoie wineia ruau.

- Sape Iawe God inainamba eudida sabamosa-  
pio,
- apava uduudu no Godimba me mukawa ita  
sapawa debamaia ewapu.
- 3 Witala aiaisintonia ita iminla oauarantona  
badomona; <sup>◊</sup>
  - 4 Apava mida santoia diamoe waase,  
“Badowa enana ita mai saitana!  
Ewanee, e Godila iede me emalawoa apanawa  
matangelamopie kadimopi,

---

<sup>◊</sup> 11:10: Rom 15.12    <sup>◊</sup> 35:3: Ibru 12.12

me wisepie mo matangelamopie ita e  
inalepi.”

- <sup>5</sup> Me wisepie apana emau potantona eumopio  
sala ewapu,  
ita mo asiu potantona eumopio gagalo  
etapu.<sup>◊</sup>
- <sup>6</sup> Apa tampu bobopu inantopue rowontopue  
biantopu,  
ita moau potawa wadaaubamopio nuae  
kawa wapu.
- Maneu dogo bedewe naimepie wisepie sala  
makowa bedewainta alepi.
- <sup>7</sup> Siata polapolaua apu itune winedia leulepitue  
doa segalepi,  
ita dogo makowa bedewe maneu wimopu.  
Ita pue dobinoa bubuau bolawa topa segalepi,  
ita topa bedewe ina daitada sape inintopu.
- <sup>8</sup> Ita inta debama ebowa “Inta Kakaiwa” bola sa  
sawanainta nosepie alepi,  
ita apana kadi dewalala inta sa asiasi mai  
antopu, dia.  
Inta sa ipa God apanawa os baibu,  
insakadisalala mai inta sa asiasi antopu, dia.
- <sup>9</sup> Pue laion ita pue onawau dobinoa mai  
inta sa nowa oso wimopu, dia,  
tane apana mida Iawe God inamona mo os inta  
sa asiasi antompa.
- <sup>10</sup> Mo leuntopue Ierusalemwa antompe nuae  
sasawa wampe antompa.

---

<sup>◊</sup> **35:5:** Matiu 11.5; Luk 7.22

Nuaeu winakasala ipa uwa benawa rua  
 uwauwo ampu,  
 mo nuaeu debamaia nopeidomopi,  
 nuaparepare ita momodu diaidalepi.

## 40

### *God apanawa wasaumodia gagalowa wade*

- 1 E Godila wadiase, “Wasau gagalowa wae apanana diamoa,  
 wasau gagalowa wae diamoa.
- 2 E nuaa aiaisiwa obasa mampe gagaloite ne apanana Ierusalem bedewe waimoia diamoe waase,  
 ‘E poka etale surakautena walamawa tauma dialen,  
 ita do Iawe God e kadila insadabuamon,  
 e kadila uduudu matangelawa ne ruantene manlawo dewasanatuwan.’
- 3 Asisuitana! Apana dea mukama benemaleidie wadi wadiase,  
 “Sala makowa bedewe Iawe God wimpia baiwa inta eusana,  
 dewa uduudu inta enabodamodia otawiaitane nambemon<sup>◊</sup>a.
- 4 Doba nuau dobosamono euntopu,  
 ita wadi kerakera ita debamau ieie odeia toaisimono apuapuntopue winadewasan-topu  
 inta kiokiou iaodala deaitopamono inta euda segantopu.  
 Ita inta bagorauia wineia deaitopamono eu-didantopu.

---

<sup>◊</sup> 40:3: Matiu 3.3; Mak 1.3; Ion 1.23

**5** Tauma Iawe God sapawa sabamolepie wisepi,  
 ita apana uduudu tawo osowe sapa sa ewata.  
 Iawe God me meba moawe gagalo ema  
 wan.”<sup>◊</sup>

**9** Saion, e Gagalo euda benemaitaa baiwa wade  
 ieiana odee,  
 aita wadi iwa ionoidolena osowe.

Ierusalem, e Gagalo euda wade ieiana ka wae  
 gagaloitaa,

ka waa mai saitaa;  
 Iuda bolawa debamau bedeuwo apala waimoia  
 mampo gagaloite waase,

“Ewane! E Godila ema ambi!”  
**10** Ulaipa, Warere Iawe God wisepie  
 mukawa debama mampe apanawa

oniampi.  
 Me unewa otamone do iedia ewana,  
 sa ipa me apanawa inamona.<sup>◊</sup>

**11** Me apanawa oniadewasamopi,  
 gamo onionia puewa oniamodia rua.

Me sipsipwa bunau otamopie,  
 mabupa osowe teamopie mampemopi.

Ita sipsip iwoa obampu do deaitopa banlade-  
 wasamopi.<sup>◊</sup>

## 42

*Iawe God meba nolawa dewalala sonabedie  
 wadiaubede apanawa mampo*

**1** Iawe God wadiase, “Ewana, apala ema ipa ne  
 nolana dewalala,

---

<sup>◊</sup> **40:5:** Luk 3.4-6    <sup>◊</sup> **40:10:** Gagalo 22.12    <sup>◊</sup> **40:11:** Isikel 34.15;  
 Ion 10.11

- ne me muka wanedina,  
 ne me sonabena ita ne nuana eudidalen me  
 mampe.  
 Ne aleuna mampe me nopesana,  
 ita me apama uduudu mampo kotuwa dodomana  
 dewasampa  
 ita mo banlamopio God mukawa atowen-  
 topu.<sup>✳</sup>
- <sup>2</sup> Me mai bola bedewainta apama mampo aiawa  
 badowa ba mukama gagalolepi, dia.
- <sup>3</sup> Me auni asiwa tewapia baiwaleidia mai  
 ampipundepi,  
 ita siwa keraudida idia mai supibolepi, dia.  
 Me kotuwa dodomana dewasapi apama udu-  
 udu mampo.
- <sup>4</sup> Me mai nuawa oaoaralepio nolawa epi,  
 me nolalempo ideita tawo osowe apama  
 uduudu dewa dodomana dewasampaa de-  
 wawa winepidewalepi.  
 Apama nowa dauwo wanwanlala me  
 waeuwa etapua onioniawantoie waimoi.<sup>✳</sup>
- <sup>6</sup> Ne Iawe God neba dodomanana bedewe  
 apaena,  
 ne e witaa wadape ita muka enepe oniade-  
 wasaepa,  
 ne e dewaepo sauwa badowa rua segaita apama  
 mampo,  
 ita e bedeawoe mo ne sauna euda wadapu  
 ita e ipa sapa uwa daitada apanawa baibu.<sup>✳</sup>

---

<sup>✳</sup> **42:1:** Matiu 3.17; 17.5; Mak 1.11; Luk 3.22; 9.35    <sup>✳</sup> **42:4:** Matiu 12.18-21    <sup>✳</sup> **42:6:** Aisaia 49.6; Luk 2.32; Aposel 13.47; 26.23

- <sup>7</sup> E apana emau potawa wadaubaitawo sala ewapu,  
ita diburalala dibura bedewe wadaubamoa,  
ita mo mida diburantone dubawa bedewe waimoia wadaubamowo inantopu!"

## 49

*Iawe God nolawa dewalala wadiaubedio uwa daitada apanawa mampo aleide*

- <sup>3</sup> Iawe God ne mainawo wane wanase, "Israel, e ipa ne nolana dewalala,  
e asiasi wadapos uduudu ne mainawolepi."

- <sup>5</sup> Iawe God ne dewanene inana bupa bedewe itunene,  
sonabanena me nolawa dewalala seganteapa.

Me epe dewasana me apanawa otamopie leumopio me mampentopua baiwa,  
Israel apanawa meba wawa bumpe awodeamopia baiwa;

Iawe God ne ituposinene ebona debamasan,  
ne Godna muka nen.

- <sup>6</sup> Iawe God wadiase, "E ne nolana dewalala,  
e nolaa eneena Iakob nosinosiwa dewamowo ebou debamalepi,  
ita do mida antone bola daitada bedewe inawaa waimoia leumowo bolawo wimopu,  
tane mai sa os.

Ne sonabaena uwa daitada apanawa sapau segaitaa,

ita e inaida gagalowa wade aite tawo  
moawa daitadawo benemaitawo etapue  
atentopu.”<sup>◊</sup>

**14** Ita Ierusalem apanawa waienase,

“Iawe God no dabuanene enen,  
me no nuaawawaidanene enen.”

**15** Iawe God mo sipoamone wanase,

“I otopa amamasadia nuaawawasapie,  
ita otopa gamosana mai nuaparewalepi ba?  
Naita oto inawa me nuaawawasapie epi,  
tane ne mai e nuaawawalepe elepa, diaida.”

## 50

*Iawe God nolawa dewala aia etepie rualepi*

**4** Warere Iawe God ne waeuwanen ambi gagalon-teape,

apana insaisau oauarau wasaumopa baiwa.  
Tadinaida uduudu me wadamesanedie asina  
wadediaubede,  
apana waeuwa atowe wandia dewawa rua  
me dima waeuwanedia etape atenteapa  
baiwa.

**5** Warere Iawe God ne mainawo sabamo gaga-loreno etane atenten,  
ita ne me aiawa mai dabuasape epona,  
ne mai me adiananasapona, dia.

**6** Ne adina wanamono epeiena,  
ita sainana wanamono korona  
bowiantoienā.

Ne naina mai weregasapona,  
tane sabamosano wasineane seseineiena.<sup>◊</sup>

---

<sup>◊</sup> **49:6:** Aisaia 42.6; Luk 2.32; Aposel 26.23; 13.47    <sup>◊</sup> **50:6:** Matiu 26.67; Mak 14.65

- 7** Tane Warere Iawe God ne saunen,  
     ema baiwa ne mai ituaisiidanteapona.  
 Sa baiwa ne insaisana badosadina,  
     ne insene atenten ando mai malanteapa.
- 8** God ipa ne tainawoido,  
     ita me ne mai wawuna da donsapona  
     wasabamoa wade.  
 Winleno ane kotu bolawa osowe kotuntata,  
     mida ne wawuna donsana umanawa wade?  
 Me mainawoido wimpie wapidewalepio etapa.<sup>†</sup>
- 9** Warere Iawe God ne saunede,  
     tauma mida ne kadina ewena wawuwa di-  
     anepi?
- Ne wakadisana waia apanawa kadi donsapu,  
     gara tontawa lalaa adapuiasaio kadileidia  
     rua.

## 52

- 7** Apana Gagalo euda wadane wadiwainta ieia  
     wau aupawa ewaewau eudida no main-  
     imbo,  
     ipawa mo wanwan euda obasa gagalowa  
     wadaneiei.  
 Me God apanawa,  
     inamona umanawa benemaleidie bola de-  
     bama Saion apanawa diamodie wadiase,  
     “E Godila warereleidie wande!”<sup>‡</sup>
- 8** Asisuitana, apana mida e bolala debama onieie  
     gonaantoia  
     nuae kawa waia etamona,  
 mo emawoido Iawe God leulene bola debama  
     Saionwa wisena,  
     ewane nuae wantoie wai.

---

<sup>†</sup> **50:8:** Rom 8.33,34    <sup>‡</sup> **52:7:** Rom 10.15; Epesus 6.15

- 9** E Ierusalem bedewe poka donsaile wainilana,  
awodeaitane nuaeū kawa wana,  
Iawe God apanawa mampolene oniamone  
saumode,  
me bolawa debama gonaaleide.
- 10** Me mukawa debama kakaiwa sabamosade,  
apana uduudu tawo osowe waimoia mampo.  
Ita apana uduudu tawo osowe wanwanlala,  
no Godimba apana kadi bedewe  
otaubamodie inamodia ewapu.

*Iawe God nolawa dewalala poka etaidasade*

- 13** Ewane, ne nolana dewalala nolawa dewasapi-  
dewae diasapi,  
ne me itupaposidepio uduudu onapolepie,  
ita ebowa debama wadepi.
- 14** Apana uara me ewane memesaidantone nuau  
rowolen,  
ipawa mo me epeieno inainamba rebare-  
baidalene koakoalen,  
mai apana inainamba rua.
- 15** Ita tauma uwa daitada apanawa uara me ewa-  
pue asosapu,  
ita warere uduudu memesantopue mai aiau  
da wapu, diaida.
- Ipawa dima umanawa mo mai etapona segalepio  
ewapu,  
mai mida ema umanawa diamopono etape  
atentopona atentopu.◊

---

◊ **52:15:** Rom 15.21

## 53

- <sup>1</sup> Aisaia wane wanase, “Iawe God,  
mida no gagalomba amonantitana  
sumanaiwantoie waimoi?  
E mida mampo mukaa sabamsaana?”<sup>◊</sup>
- <sup>2</sup> Iawe God nolawa dewalala nitu inioauaraleidia  
rua oauara me danawe inilen,  
ia wapa sala makowa bedewe winedie inilei-  
dia rua inilen.
- Me mai inainamba ewaewa apava pokawaa euda  
no nuamba teinepia baiwa,  
me mai euwa da no nuaunepio warorosata,  
dia.
- <sup>3</sup> No me ewadabuasate nibuasatana,  
me ipa poka ita siga daitada etaetala  
apanawa,  
no me adiananasatana,  
ita mai wiwirawantepe apava eboeboua rua  
ituposisapona.
- <sup>4</sup> No insetanase me poka etedia sa ipa God me  
matangelasade meba kadiwa baiwa.  
Tane sa ipa dia, no keromba ita pokamba daitada  
awanenauben.
- Me no saimba osoweleno awanen.<sup>◊</sup>
- <sup>5</sup> No dewamba kadiwa baiwa me eneiena,  
no dewamba kadiwa baiwa me epeiena;  
me poka etena bedewe no wanwan euda obasa  
donsatana,  
me epeiena kerowa bedewe no inanten.<sup>◊</sup>
- <sup>6</sup> No uduudu sipsip rebaleidie inta banuleidia rua  
rebanten,  
no deadea nuba intambointambo antite;

---

<sup>◊</sup> **53:1:** Rom 10.16; Ion 12.38    <sup>◊</sup> **53:4:** Matiu 8.17    <sup>◊</sup> **53:5:** 1  
Pita 2.24

tane Iawe God no wawumba ita kadimba daitada  
 matangelawa me osowe ituno awanene  
 pokawa eten.<sup>◊</sup>

- <sup>7</sup> Mo me dewasaieno poka rebarebaida eten,  
 me mai aiawa da wapona, dia,  
 tane nua aiaisiwa mampe sai sa awanen.  
 Mo sipsip bosapua apanawa mampe banleie an-  
 toia rua  
 banlene bosapua baiwa antoien;<sup>◊</sup>  
 sipsip bunawa imba totontoia apanawa  
 danauwo onasia enedia rua,  
 me onawa apanawa danauwo daina di  
 enedie.<sup>◊</sup>
- <sup>8</sup> Mo me wadanaitue antone mai dodomana asiasi  
 kotusapona,  
 di wadane anton ita mai mida da me adi-  
 welepe umanawa wapona, dia.  
 No kadiwamba baiwa me eine bosaiena.
- <sup>9</sup> Me mai apuna da kadisapona,  
 me mai laga da wapona,<sup>◊</sup>  
 tane me kadi dewalala bontone wineiawo dobon-  
 toiena,  
 me maura apanawa domba bedewe ituiena.

- <sup>10</sup> Mo me epaepabobosaieno poka etene nua-  
 pareidalena  
 sa ipa Iawe God insaisawalena rua segalen;  
 nola dewalala sa meba etepa amonalene pulo rua  
 kadi baiwa ituna,  
 me damba uaralepia baiwa.  
 Me ando walama dauma wankasalepi,

<sup>◊</sup> 53:6: 1 Pita 2.25    <sup>◊</sup> 53:7: Gagalo 5.6    <sup>◊</sup> 53:7: Aposel 8.32,33

<sup>◊</sup> 53:9: 1 Pita 2.22

ita me bedewee Iawe God insaisawa  
ipawanalepi.

**11** Me poka etene nuaparelena ipawa ando itupio  
ewepie nuaeuwalepi,  
me ando atenlepi me mai di poka etape  
nuaparelepona, dia.

Iawe God wadiase, “Ne nolana dewalala  
dodomana apuna uara dewamopio  
dodomana segantopu, ipawa mo kadiu  
saiwa matangelawa awanepiaubepia  
mampe.

**12** Ne me dewasapo eboeboua segalepi,  
ita itupaposidepio apuna eboeboua bedeu-  
wolepi,  
ipawa me inawawa amonalene bolena baiwa,  
ita apuna me ebowa waiena kadi dewalala  
apanawa da.<sup>◊</sup>

Me kadi daitada dewalala kadiu matangelawa  
wadene,  
ita mo baibu rauparilen.”

## 54

### *Iawe God Israel apanawa nuawadawadamode*

**5** Me mida e dewaena ipa e badaa,  
me ebowa ipa Iawe God Mukamukaua udu-  
udu onapolene oniamode,  
Israelwa Godiu kakaiwa ipa e inawala,  
me ebowa waia ipa tawo uduudu Godiu.

**6** E ipa i sanaa nainaila badawa edio nuaparelei-  
die wandia rua.  
Tane Iawe God umanaa wapio leuite mampe  
winea.

---

<sup>◊</sup> **53:12:** Mak 15.28; Luk 22.37

- <sup>7</sup> Iawe God mida e oniaedia ema epe wade,  
     “Walama kampaida os baiwa ne een,  
     tane nuaparena debama mampe leuepo  
     mainawo winea.
- <sup>8</sup> Ne nuana kadileno walama kampaida bedewe  
     ne adiananaena,  
     tane nuawadawadana winakasala mampe  
     ne nuaparena e manawo sabamosapa.”

Iawe God me mida e kakailedie onialedia ema epe  
     wade

<sup>9</sup> “Noa walamawe ne sauantena mai osowe abaia  
     wapaaubepo tawo kadisapi,<sup>◊</sup>  
     epe rua ne sauantedina mai osowe adi-  
     ananaepa,  
     ita ne mai osowe matangelaepa, dia.

<sup>10</sup> Naita wadi debamau ba kerakerau lawosan-  
     topue diantopu,  
     tane ne nuawadawana mai dialepi,  
     ita ne wanwan euda obasa eneepa sauawa wana  
     winakasalepi,”  
     sa ipa Iawe God mida nuaparealeidia epe  
     wade.

## 55

*Iawe God apava gadompau makoleidua niso-  
 mode*

*Iawe God wadiase,*

- <sup>1</sup> “E mida gadompala makoleidua,  
     winlene esa nana,  
     e mida manlawo mane dia,  
     winlene nana wadane nana,

---

<sup>◊</sup> 54:9: Bumpai 9.8-17

winlene wain ita ama sogapa nana, mai  
malesawa do.<sup>◊</sup>

<sup>2</sup> E manela mai nana kadiu osouwo di diasanuna,  
nana dainea e nailano mai pokaleipona mai  
nolawaitana.

Ne aiana asisusane ita nana euda nane pokalepi,  
nana ema euda daudaua nane nuaeuitana.

<sup>3</sup> Ne aiana etane mainawo winlena,  
ne asisuneane ita e inaida wadana,  
ne sauana badowa winakasala e manlawo wapa,  
ne e nuawadawadalepe euda manlawo de-  
wasapa, warere Dawid mampe sauantena  
rua.”<sup>◊</sup>

### *Iawe God perowetawa wadiase,*

<sup>6</sup> “E tauma Iawe God manlawolena mampe banu-  
sane donsana,  
tauma me tanlawolena mampe me iririsana.

<sup>7</sup> E kadiwa dewalala kadiwa ene leuitana,  
ita insaisala kadiu insamoilana emona.

E leuitane Iawe God mampe aitano me e nuapar-  
elalepie saulepi,  
e no Godimba mampe rauparitano kadila  
uduudu insadabuamopi.”

<sup>8</sup> Iawe God wadiase, “Ne insaisana ipa mai e  
insaisala rua,  
ne dewana ipa mai e dewala rua.

<sup>9</sup> Uba mai maida ionoido winedia rua,  
ne dewana ipa ionoidolen mai e dewala rua,  
ne insaisana ipa ionoidolen mai e insaisala  
rua.

---

<sup>◊</sup> **55:1:** Gagalo 21.6; 22.17    <sup>◊</sup> **55:3:** Aposel 13.34

10 Unu ita giou obasa do uboe ieia,  
mai di ieipona,  
mo tawo butasaie bibiasaio,  
ina inintoi,  
ita apana iraintoie nana nai.<sup>◊</sup>

11 Epe rua ne aiana mai di leulepie mainawo  
wisepi,  
tane ne dima menanedia nolawa dewasapio  
segalepi.

Me dima uduudu ne menanena dewasapituwapi,  
ita insaisana uduudu dewasapie  
diasapituwapi.”

## 56

### *Apana uduudu rauparintompa duwa*

<sup>1</sup> Iawe God wadiase, “Ne walama kerauda os  
bedewe wineape inalepa.

Ne dewana dodomana apuna uduudu mampo  
sabamosapo ewapu,  
sa baiwa e ulaipa ita dodomana mampe  
apuna mampo dewasanuna.

6 Ando bola da apau inawau amonantopue ne  
Iawe God mainawo wimopue,  
ita dima ne menanedia rua dewasapu,  
mo ne nuawadawadaneapue wadaposineapu,  
ne bubuana walamawa mo wiwirawantopu,  
mo ne sauana badowa wanaa wadapui-  
tudepi.

---

<sup>◊</sup> **55:10:** 2 Korint 9.10

<sup>7</sup> Bola da apanawa sa ne otamope wadina kakaiwa\* osowe teamopa,  
ita ne rauparina duwa bedewe nuaeuna wanamopa.

Mo amonau susula ita amonau isiwa ne watana  
osowe teamompa ne nuaeubuntepine  
mainawomopina,  
apano uduudu ne duna kakaiwa ebowa wa-  
pue wapuase, uwa daitada apanawa rau-  
parintompa duwa.”<sup>†</sup>

## 58

*Ulaipa ita laga wadaposiwa gagalowa  
Wadapos inainamba dainea euda Iawe God  
ewedie nuawa euleidia umanawa wade.*

<sup>7</sup> “Mo mida omana tomodia nanala moawa wana-  
mono napu,  
ita apapa mida bolau dia bola wanamono  
wampu,  
mo mida gara abolawantoia garala wanamona,  
do osina sosolaida mai adianananamona.<sup>‡</sup>

<sup>8</sup> E epe dewaitano ne sapana omo sanaa wisedie  
sapa wadia rua  
e osolawo sapa wapi,  
e kerola inantopua walamawa maidaleide,  
ne bautanteape e intala dodomanasapa,  
ne adilawo enape mukana debama mampe  
oniadewasalepa.

---

\* **56:7:** Wadi kakaiwa umanawa wadia sa ipa wadi Ierusalem  
bedewe winedia umanawa wade ebowa, da waia Saion.    † **56:7:**  
Matiu 21.13; Mak 11.17; Luk 19.46    ‡ **58:7:** Matiu 25.34-36

<sup>9</sup> Ita e ne mainawo rauparitano etalepe sipoasapa,  
 ita e sau baiwa apaitonuno ne etalepe wappaase,  
 ‘Ne ema!’

E mai apana osouwo sai itununa,  
 ita mai wakadisamonuna ba lagau wana, dia.

<sup>10</sup> Apana omana totopu mukala uduudu mampe  
 saumonuna,  
 ita mo mida bagorantoia mukala uduudu  
 mampe  
 nolaitonune saumonuna,  
 e epe dewaitonuno e sapala dubawa bedewe  
 sapa wapi,  
 ita tadina uduudu e manlawo ipa walama  
 sapawa rua winompa.”

## 61

*Iawe God apanawa nuaparelala gagalou Wade  
 Iawe God nolawa dewalala sonabala wadiase,*

<sup>1</sup> “Warere Iawe God aleupa ne osonawosan,  
 me ne sonabanene mena\* osonawo memen  
 Gagalo euda abolala mampo amonanteapo  
 etapua baiwa,  
 me ne waaubanea apana nuau kerola inamopaa  
 baiwa,  
 me ne waaubaneno winena apana tautaula  
 dibura bedewe waimoia  
 benemamopo dibura epue inantopu,

---

\* **61:1:** Apana osowe mena memeia sa ipa apana sa nola debama wadena dewasapia eueuwa. Mo dewa sa warere ita pirisi mampo dewasai.

mo mida diburantone dubawa bedewe waimoia  
lotoaubamopo inantopu.<sup>◊</sup>

<sup>2</sup> Me ne waaubanena apana diamope wapase,  
'Iawe God e inalepia walamawa tauma  
wisen,

walama ema bedewe me emalawoa uduudu  
sipoamopie matangelamopi.'<sup>◊</sup>

Me ne waaubanena apana ke waie nuaparen-  
toia nuadubumopaa baiwa.<sup>◊</sup>

<sup>3</sup> Me ne waaubanena apana Ierusalem be-  
dewe nuapareidantoie waimoia saumopaa  
baiwa,  
mo nuaparentoie isana toie<sup>†</sup> waimoia eu-  
mope ita bena uwatauwa eudida uwauwo  
ampa.

Mo nuaeubu eueuwa mena wadapue uwau laus-  
intopu ita ke waia epu,  
wadapos gagalowa mo moapo  
winakasalempo wampe os waimompa,  
ita nuapareu dialepi.

Mo dewau eudidalepio badowa enapu ia eudida  
bonoia badowa enedie inileidia rua,  
ia sa eubu Iawe God meba aimona me eu-  
wawa ita mukawa apana euwamopio ewa-  
pua baiwa.

<sup>6</sup> Apana ando e umanala wapue wapuase,  
'E ipa Iawe God pirisiwa'  
do wapuase, 'E ipa Iawe God nolawa de-  
walala.

---

<sup>◊</sup> **61:1:** Matiu 11.5; Luk 7.22    <sup>◊</sup> **61:2:** Luk 4.18,19    <sup>◊</sup> **61:2:**  
Matiu 5.4    <sup>†</sup> **61:3:** Mo isana osouwo teia sa ipa mo nitu da  
nuaparewantoia eueuwa dewasai.

E ando tawo osowe uwa daitada apanawa  
 mampo nitu eubu otamona,  
 ita apava sa asiisi e mauraitane asowawait-  
 ana.”

*Iawe God wadiase,*

<sup>8</sup> “Ne dodomana dewawa dewasampaa nu-  
 awadawadasadina,  
 poi ita dewa kadiu ne dabuaidanede.

Ne apanana poka eteia baiwa uneu euda  
 wanamopa,  
 ne apanana mampo sauana badowa wape ita  
 wadapaitudepio winakasalepi.

<sup>9</sup> Uwa daitada apanawa tawo osowe wanwan-  
 lala ne apanana ita mo nosinosiu do aten-  
 mopue ita wiwirauntopu,  
 mo ewamopue wapuase,

‘Ulaipa, Iawe God apava ema osouwo sau euda  
 itun!’

*Israel wadiase,*

<sup>10</sup> “Iawe God nuaeuwantedina  
 ita do ne Godna dewa euda mainawo de-  
 wasana baiwa nueuidantedina.

Me ne inanen ita dewaneno dodomananten me  
 meba rua,  
 ina ita dewa dodomana sa ipa ne garana rua;  
 me ne benanena ewaewawa ipa apava mida  
 nainai baiwaleidie nainai garawa eubuida  
 taumodia rua,

me ne benanena ewaewawa i nainai baiwaleidie  
 beran inoleidie benaleidie rua.<sup>◊</sup>

<sup>11</sup> Dogo bedewe nitu daitada inintoie wimoia rua,  
 irai bedewe lawuru daitada inintopue  
 wimopu,

---

<sup>◊</sup> **61:10:** Gagalo 21.2

Epe rua deawaa, Warere Iawe God apana udu-  
 udu tawo osowe wanwanla dewamopio me  
 wadaposisapu,  
 me dewawa dodomana tawo uduudu  
 apanawa mampo sabamosapi.”

## 64

### *Iawe God nuaparewa ita sauwa raupariwa*

- <sup>4</sup> Mapoido mai mida da God da e ruaa umanawa etapona,  
 mai mida da God da e ruaa ewapona;  
 e apuna mida sumanaiantoie waimoia saumoiana.<sup>◊</sup>
- <sup>5</sup> Apuna mida nuaeu mampe dewa eubu dewamoie,  
 ita e intaa dodomana asiasi antoia e saumoiana.
- Tane e nuaa kadilen no mainimbo,  
 ipawa no walama daumawa kadiwa dewakasanten.
- Apuna inainanimba epe ambi e inanea?
- <sup>6</sup> No dewamba kadiwa sa dewaneno e emaawo miramiraidanten,  
 no dewamba eubu rubumoite dewamoitana e emaawo ewaewa ipa gara kepawa miramiraua rua.
- No tonaidanten ia asiwa tonantoia rua,  
 ita lanunu ia asiwa uwakokomodio nomoia rua,  
 no dewamba kadiu awananene alene kadiidanen.
- <sup>7</sup> Tane mai mida e manawo rauparileipona,  
 ba sau baiwa e manawo ieipe waitaraeipona,  
 dia,  
 no kadimba baiwa e adianananee eneana,

---

<sup>◊</sup> **64:4:** 1 Korint 2.9

e no eneano nuba kadimba kadiidanen.

<sup>8</sup> Tane Iawe God e ipa no mamamba,  
no ipa onta rua ita e eba ipa onta dewalala  
rúa,  
e witaa mampe no dewaneana.

<sup>9</sup> Mai nua kadilempa no mainimbo,  
no kadiwamba mai nuaawo ituwo winompo  
insene os wanempa,  
no uduudu ipa e apaanaa,  
sa baiwa nuaparembaite leuite ewanea.

**Ina Sanaa Gagalowa  
The New Testament in the Kanasi Language of Papua  
New Guinea  
Nupela Testamen long tokples Kanasi long Niugini**  
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files  
dated 31 Aug 2023

b27bd40e-e091-5268-bcbf-8232e1d7501a